

PN simu ona notifikasaun TR relasiona fundu veteranu iha OJE 2023 inkonstitusionalidade

DILI, 14 dezembru 2022 (TATOLI)—Presidente Parlamentu Nasionál, Aniceto Longuinhos Guterres Lopes, informa PN simu ona notifikasaun hosi Tribunál Rekursu (TR) relasiona ho fundu veteranu biliaun \$1 iha proposta lei Orsamentu Jerál Estadu (OJE) 2023 inkonstitusionalidade.

“Ha’u simu ona notifikasaun no desizaun Tribunál ne’e vinkula tenke obedese sei laiha buat ida hadi’a,” Presidente PN ne’e hateten ba jornalista sira iha PN, kuarta ne’e.

Nune’e, nia hatutan, asuntu ne’e inkonstitusional ona ne’e vinkula jerál ita hotu tenke kumpre regra hanesan ne’e tuir konstituisaun ne’ebé desizaun Tribunál mak prevalese no PN sei la hadi’a fila-fali no mantein, nune’e proposta lei OJE 2023 iha artigu ba kriaun fundu veteranu ne’e sei la vale.

“Deklara inkonstitusional osan ne’e halo transferénsia fó fila,” nia hateten. Aniceto Guterres hateten, ho desizaun TR nian ne’e klaru iha impaktu ba proposta OJE 2023 maibé ita la’o tuir nia sistema.

“Hanesan ne’e kabe ba Presidente Repúblika nia kompeténsia maibé Presidente Repúblika kestiona de’it mak fundu veteranu antes orsamentu aprova mós Presidente Repúblika hatama tiha ona nia rekerimentu ka rekere tiha ona ba halo fiskalizaun preventiva no desizaun foin sai agora,” nia dehan.

Tan ne’e, Líder Órgaun Lejislativa ne’e hein katak prazu ba Xefe Estadu tuir konstituisaun PR iha kompeténsia tomak atu veta ka promulga tuir prazu estipula.

Antes ne’e, Presidente Repúblika (PR), José Ramos Horta, hateten nia-parte hato’o pedidu ba Tribunál Rekursu (TR) hodi hala’o fiskalizaun preventiva ba fundu veteranu biliaun \$1 iha proposta lei Orsamentu Jerál Estadu (OJE) 2023.

“Ne’e só halo de’it fiskalizaun preventiva kona-ba fundu veteranu nian tanba ha’u iha dúvida parte konstitusional únika instituisaun bele rezolve dúvida sira-ne’e mak Tribunál Rekursu,” Xefe Estadu hateten ba jornalista sira iha Palásiu Prezidensiál, Bairru Pite, semana kotuk.

Horta hateten, mezmú Tribunál Rekursu karik hetan inkonstitusionalidade la afeta OJE 2023 ne’e ketak.

“Purtantu lalika preokupa, Governu sira preokupa ho Orsamentu Jerál Estadu (OJE) 2023 maibé tanba jurísta balun la’ós agora de’it dezde tinan kotuk hanesan dezáfíu ida kestiona konstitusionalidade fundu veteranu nian,” nia hateten.

Hanesan Xefe Estadu tenke haruka lai ba órgaun judisiáriu hanesan TR, nune’e TR sei fó klarifikasaun ba ida-ne’e iha tempu badak.

Mezmú nune’e, sei la afeta tempu ne’e ba promulgasaun OJE tinan oin ne’ebé sei akontese antes tinan 2022 nia rohan ne’e.

Ho PR nia pedidu ne'e, PR husu fiskalizaun preventiva ne'e mak tuir desizaun TR liuhosi juiz kolektivu iha forsa obrigatória jerál inskontituisionalidade violasaun ba prinsípiu proporsionalidade no utilizaun rekursu natural justa no igualitária previstu iha artigu 1 ho 139 konstituiaun Repúblika Demokrátika Timor-Leste (KDRTL).

Enkuantu, iha loron 17 fulan novembru tinan ne'e, Parlamentu Nasionál (PN) liuhosi reuniaun plenária, aprova proposta lei númeru 46/V(5a) Orsamentu Jerál Estadu (OJE) 2023 ho montante biliaun \$3,16 iha finál globál ho votu a-favór 42, kontra 21 no abstensaun rua (2).

Proposta OJE 2023 ho montante biliaun \$3,16 kompostu hosi orsamentu administrasaun sentrá biliaun \$2,8 (montante ne'e inklui ona Fundu Kombatente Libertasaun Nasionál, biliaun \$1), orsamentu seguransa sosiál hetan alokasaun millaun \$235,7 no RAEOA millaun \$120.

Antes ne'e, iha loron 26 abril 2022, Governu liuhosi reuniaun Konsellu Ministru (KM) extraordinária aprova alterasaun daruak kriasaun fundu kombatente libertasaun nasional.

Enkuantu, kriasaun fundu kombatente libertasaun nasional hodi garante finansimentu adekua ba programa apoiu ba kombatente libertasaun nasional.

"Ho proposta lei ida-ne'e mak sei prosede mós kriasaun Fundu Kombatente Libertasaun Nasionál ho valór millaun \$1.000 (bilian \$1), hodi garante finansimentu adekua ba programa apoiu ba Kombatente Libertasaun Nasionál mak hanesan iha área apoiu sosiál, edukasaun, saúde, empregu, asesu ba kréditu no atividade sira-ne'ebé hamosu rendimentu," Ministru Prezidénsia Konsellu Ministru, Fidelis Manuel Leite Mangahães hateten hafoin reuniaun ezeutivu iha Palásiu Governu.

To'o janeiru 2022, fundu kontributivu veteranu akumula ona millaun \$20-resin iha konta fundu veteranu nian ho benefisiáriu hamutuk 27.828.

Investimentu fundu hahú hosi janeiru 2020 to'o agora, ne'ebé kada fulan Ministériu Asuntu Kombatente Libertasaun Nasionál hanesan ministériu implementadór programa, ko'a osan \$30 hosi kada veteranu ho total veteranu ne'ebé sai benefisiáriu hamutuk 27.000-resin, hodi depozita ba Banku Nasionál Komérsiu Timor-Leste (BNCTL, sigla portugés).

Polítika Governu mak atu garante sustentabilidade ba veteranu sira-ne'ebé atu transforma ba investimentu ida hodi husik ba veteranu sira-nia oan iha futuru.

Antes implementa polítika ne'e, Sekretariadu Estadu Asuntu Kombatente no Libertasaun Nasionál (SEAKLN) halo ona sensibilizasaun ba veteranu benefisiáriu iha munisípiu hotu hodi hetan aseitasaun.

Nune'e mós, liuhosi kongresu konsellu nasional kombatente libertasaun nasional dahuluk aprova deliberaun númeru 01, iha loron 21 dezembru 2019, hodi fó kbiit ba SEAKLN hodi hahú implementa polítika kriasaun fundu investimentu ba veteranu.

Jornalista : Nelson de Sousa

Editór : Cancio Ximenes

Deklarasaun inkonstitusionalidade automátika fundu veteranu iha proposta OJE 2023 laiha efeitou



Prezidente Parlamentu Nasionál (PNN), Aniceto Longuinhos Guterres Lopes. Imajen Tatoli/Francisco Sony.

DILI, 14 dezembru 2022 (TATOLI)—Prezidente Parlamentu Nasionál, Aniceto Longuinhos Guterres Lopes, hateten ho deklarasaun hosi Tribunál Rekursu (TR) inkonstitusionalidade mak automátika ba fundu veteranu billaun \$1 iha proposta-lei Orsamentu Jerál Estadu (OJE) 2023 laiha efeitou ka hasai imediata.

“Ami ko’alia kona-ba promulgasaun Orsamentu Jerál Estadu 2023 ne’ebé ninia parte ida Tribunál Rekursu deklara inkonstitusional liu-liu verba ida kona-ba fundu veteranu nian. Tribunál dekreta tiha ona ne’e inkonstitusional fundu ida-ne’e fica sem efeito,” Prezidente PN hateten ba jornalista sira hafoin ramata enkontru ho Xefe Estadu iha Palásiu Prezidensiál, Bairru Pite, kuarta ne’e.

Nune’e, hakarak ka lakohi Prezidente Repúblika ho Tribunál Rekursu ezese sira-nia poder konstitusional ne’e tuir konstituisaun no desizaun Tribunál ne’e prevalese hotu kualkér desizaun Estadu nian

“Tribunál dekreta tiha ona ne’e inkonstitusional fundu ida-ne’e fica sem efeito,” nia dehan.

Mezmu nune’e, deklarasaun inkonstitusionalidade ba fundu veteranu la afeta ba Orsamentu Jerál Estadu (OJE) 2023.

“No Prezidente Repúblika, ohin lokra’ik, nia sei promulga Orsamentu Jerál Estadu ho rezerva ida ohin inkonstitusional,” nia hateten.

PR promulga proposta-lei OJE 2023 exepu ida Tribunál Rekursu deklara inkonstitusional ida ne’e laiha efeitou ona ida-ne’e Prezidente Repúblika la promulga, tanba ne’e obrigatóriu tenke hanesan ne’e.

Nia hateten, fundu veteranu ne’e la efeitou ona mak montante proposta OJE 2023 hosi montante inisial sei iha redusaun billaun \$1 nune’e hela de’it billaun \$2-resin.

“Ne’e la signifika Governu laiha ona dalan seluk atu hola medida política ruma fó solusaun ba problema veteranu nian,” nia hateten.

Desizaun TR kona-ba fundu veteranu inkonstitusionalidade ne'e loos



Líder Nasionál no Atual Xefe Negosiadór Prinsipál Delimitasaun Fronteira Terrestre, Xanana Gusmão. Imajen Tatoli /Egas Cristovão.

DILI, 14 dezenbru 2022 (TATOLI)—Líder Nasionál no Atual Xefe Negosiadór Prinsipál Delimitasaun Fronteira Terrestre, Xanana Gusmão, konsidera desizaun Tribunál Rekursu (TR) ba inkonstitusionalidade ba fundu veteranu biliaun \$1 iha proposta-lei Orsamentu Jerál Estadu (OJE) 2023 ne'e loos tebes.

“Ha’u komprende tebes tanba fofoun rona ko’alia hanesan sidadaun ida laiha buat ida no kongratula Tribunál Kontas hodi fó sai desizaun ida-ne’ebé loos tebes,” Xanana Gusmão hateten ba jornalista sira hafoin ramata enkontru ho Xefe Estadu, José Ramos Horta, iha Palásiu Prezidensiál Nicolau Lobato, Bairro Pite, kuarta ne’e.

Tanba ne’e, líder rezisténsia ne’e hakruuk ba desizaun autoridade judisiáriu ninian kona-ba inkonstitusionalidade ida-ne’e.

“Ha’u hakruk ba Tribunál tanba hatudu daudaun ona, haree tuir lei no Sistema,” nia dehan.

Tuir Xanana Gusmão nia haree ba undu veteran, ba buat barak ne’ebé timoroan sira la devia halo.

“Ida-ne’e hatudu ida hahú fiar katak juiz sira komesa haree ba ita-nia Estadu ne’e ninia saida mak ladi’ak ne’e, dehan ladi’ak la’ós taka matan,” nia hateten

Desizaun fundu veteranu inkonstitusionalidade ne'e TR nia kompeténsia



Prezidente Konsellu Kombatente Libertasaun Nasionál, Vidal de Jesus “Riak Leman”. Imajen Tatoli/Francisco Sony.

DILI, 16 dezembru 2022 (TATOLI)—Prezidente Komisaun Kombatente Libertasaun Nasionál (CCLN-sigla portugés), Vidal de Jesus ‘Riak Leman’, hateten desizaun fundu veteranu biliaun \$1 iha proposta-lei Orsamentu JerálEstadu (OJE) 2023 inkonstitusionalidade ne'e, Tribunál Rekursu (TR) nia kompeténsia.

“Instituisaun mais altu ne'e Tribunál Rekursu ho Prezidente Repúblika nia kompeténsia, sira mak hatene. Bainhira Tribunál Rekursu hasai desizaun dehan inkonstitusionalidade entaun ne'e loos tanba sira mak hatene liu no sira mak foti desizaun ba asuntu ida-ne'e,” Vidal de Jesus ‘Riak Leman’ hateten ba Agência Tatoli, liuhosi telefónika, sesta ne'e.

Reak Leman hatutan, bainhira dehan inkonstitusionalidade katak ida-ne'e kontra duni lei balun entaun órgaun kompetente iha kompeténsia atu foti desizaun no ida-ne'e labele duni.

Tanba ne'e, hakarak klarifika katak osan biliaun \$1 ne'e sei laiha impliksaun ba planu, programa no atividade saidade'it iha Ministériu Asuntu Kombatente Libertsan Nasionál (MAKLN), tanba orsamentu sira ba ida-ne'e buat ketak ida no laiha ligasaun ba asuntu refere.

“Agora biliaun \$1 ne'e, kompeténsia no responsabilidade Primeiru-Ministru, Taur Matan Ruak nian tanba ne'e ha'u hakarak dehan laiha implikasaun ba atividade hotu-hotu ne'ebé ita-nia MAKLN planea ona antes, tanba nia iha osan ketak mak Orsamentu Jerál Estadu (OJE) ne'e,” nia dehan.

Jornalista : Osória Marques

Editór : Cancio Ximenes